

# **Jonasarini kuku Kirak yuwaa Jonasarinee kamanku anoo pakich kamanchintspa**

## **¿Chakaja anoo yandarang?**

Chakamasaja nee kirak yandarangiya. Yaserreezini. Itaru, tputs Jonasarinee kuk kamankiya. Jonasarinee yuwapur Jerobowam Israelshucheem kurak taarangu, anpurtatam taarangiya. Arapich tputs Ninipish yakat taarangsin, Israelchichee izuuru tpachingamaam zandaranganaya. Kizpur undararimuncha. Israelchich tputs uru, Apanll iyaatsimari chinakiya. ¿Antaati arapich tputsee tapachindacheeja? tárangeanaya. Ashirucha, Jonasarinee amb naamaam kapung ngatarangiya Apanllee kuk kamanimaama.

## **¿Chakaama yandarang?**

Apanll Jonasarinee, Nuwap tputsiri nuwaa kuki kamanishincha, nda tárange. Itaru, Ninipip kamanishincha, tárange. Ninipshuch tputs kizpur yutarit taaranganaya. Uwshtisin tsapurunasee ztaru tputs wamari kasiranganaya. Ashirucha, Apanll, Nuwsha Ninipshuchee zurampatari wanichima, tárange. Itaru, shiynaa Jonasaa, nduma wanichuri, wasina kamanshini, tárange.

Ashiritaa, Apanll nee kirak Israelchichpatatin wanimaam tuyandarangiya. Nuw tsapurunasee tputsi ichingaru chinakina, tápi átu atiya.

## **¿Mayaamaja yandarang?**

Israelchich tputs, Apanll iyaatsimari chinakiya, tárangusin, Apanllsha, Tárintspa. Nuw kchinamisheeruri, arapcheetstaa tputs chinakina. Tputsee ichingaru nuw nayanikuri, tapachindamaam zandkina, tárangiya. Jonasarini waana tárangiya. Apaa, shiy nda musá tsiyantaksha. Watam shiy Apaa, kchinamishawa. ¿Antaati shiy Ninipshuchee tunaree wanicheezish? tárangiya.

## **¿Mayaatseeja kamanik?**

Na yuwari kamanku anoo kamanchintspa.

Kapitoroo 1. Apanll Jonasarinee, Ninipip nuwaa kuki kamanishini. Kundarareetstaata kamaningcha, tárangiya. Jonasarinsha kapung ngatarangu, nllitarap tsap suwapi tárangu, Apanllee kuk kapeetarangu, kayupichsha Jonasaa pisharangiya.

Kapitoroo 2. Jonasarinsha kayupchimand chik Apanllpat tsiyatarangu, Apaa, nuw yutartana. Nuw shiyaa kukish kapeetarangina. Ashiriy nuwaa nayingandama, tárangu, Apanllsha mazinarangiya.

Kapitoroo 3. Jonasarini Ninipip naatarangu, Apanll siyaa zurampatari wanichintsa. Nimun 40 maats ichingurus tsipatssa, tárangiya.

Kapitoroo 4. Ninipshuchsha tputs Apanllee mangoonarangsin, yutaritshirinee izuuru kasayarangusin, Apanllsha nayanirangu, Ashiriya, wanimaaam watsitshaparee, tárangiya. Anumand Jonasarini kapung tsiyantarangu, tsiyansimun tsipamaam

zandarangiya. Itaru Apanllsha, ¿Mayaamsha ashiru chinaksha? Nuw tputsee ichingaru chinaktana, tárangeiya.

## **Jonasarini kuku**

### *Jonasarinee kuk kamanchintspa*

<sup>1</sup> Apanll Jonassaa, Amitarineetsi wip kamach-taku tárangeiya. <sup>2</sup> Shiy Ninipip yakat na naachcha. Nuwaa kuki kamanishincha, watam nuw an-shuchee mikeeruri wanichinawa. Na nuw tsiy-atsee mazinarangina. Ninipshuch yakat tputs yutaritshishpansincha, tárangeiya.

<sup>3</sup> Itaru, Jonassha Ninipip Apanllee kuk kaman-imaa kapung ngatarangu, suwamarisha chinarangiya. Ashiri upeewapsha botee napkatu, patussip naatarangiya. Patusis sur Jopimuncha. Ashiri anush bot yuwaa naamachu, tununkachu, anoo parangiya. Ashiri botish naamaam tuwaparangiya. Sheeru, botish zaruyaru naatarangiya. <sup>4</sup> Itaru, Apanllsha kambusuru zanganirangiya. Kambusursha kizpur kambustarangu, marsha kizpur warastarangiya. Botsha izuuru yangamaam zandarangiya. Bot kizpur zpuzarangiya. Pátangamaam zandarangiya. <sup>5</sup> Ashiri botee ksutamapansha kapung puniranganaya. Minamtawarisin apan-llputsirineetsi mashiranganaya. Anumunsha, botee tamuzingamaam mangush chinarangusin, maacheetsi kóstaroo kungush kapeetaranganaya. Itaru, Jonassha mapiyru wantsush pshturu, wachoo shtandayaru, maa ashirangiya. <sup>6</sup> Ashiri kapitansha yap Jonas mapiyru maaru amb

naateeru tsiyatarangiya. ¿Shiy tamaktish nish mapiyru maasha? Natu mikeerush chiyzayarush, apanllireetsish mashangi. ¿Nduniya ashkachush, iyaatssha shiy Apanllirish istach? mang Jonasaa tárangeiya.

<sup>7</sup> Ashiri anumunsha, botee ksutamapansha waanpatatin tsiyatkusin, Na yachayani. ¿Chakaja yutaritshishirini taaru anumand Apanll ashik? atusin, tputsee sur yandarangusin, yacharangusin, Jonasaamsha sur shitungarangiya. Ashiri Jonasaatssha kurpashtaranganaya. <sup>8</sup> Kapitansha Jonasaa, Na kamaninda. ¿Mayaamsha shiy iyash zarurangsha? ¿Sheerush, iyaatssha tayuritaksha? ¿Maysha paxanxkatush, shiy iyash zarurangsha? ¿Yapsha shiy naatachsha? ¿Yapichsha shiya? ¿Chakshasha shiya? tárangeiya. <sup>9</sup> Ashiri Jonassha, Nuw Hebrewshuchtana tputsi. Mishat, nuw tayaspataampantana Apanlee íwarpicheetsi, yuw maree tinarangu, anumun tsapootstam tinarangu anootsi.

<sup>10-11</sup> Nuw Apanlee kuk nda payumaam zandaranguri, ningeemsha suwarangina, tárangeiya. Itsinsaru kamanirangtaa, itaru marsha nda pakchiyam zanayarangiya. Aranginasha kizpurinasha warastarangiya. Ashiri tputs aranginasha punirangusin, anumun masharanganaya. Ashiriya, ¿mayaamsha amb ashirangsha? ¿Na shiyaa tamaycheezini mar zanayamaama? tárangeyanaya. <sup>12</sup> Jonassha, Ashiri marish kpitangandama. Nuw nuwaanaatsi izuuru yasaktana. Nuwcha yutaritti. Mishat, nuwamand yutaritshishiri kambusur kizpur

kambustakiya. Warassha kizpuritam warastakiya, tárangiya Jonasa.

**13** Itaru, botee ksutamapanshtisin arachich kiteeni atusin, kizpuritaa kchungarangsin, nda waritaranganaya. Watam mar kizpur warastaranguwa. Aranginasha, aranginasha ashirangiya. Izuuru arachich kitamaam pinasaranganaya. **14** Apanlleetssha masha-ranganaya. Apaa, Jonasamand yutaritshishirini iyaa kungush tpachingarispaa. Mishat, iyaa waneerichpa, yuwamand iy Jonasaa kungush kapeetkachini anumanda. Watam shaana tputsee natstayarush, wanitarshawa, Apanlee táranganaya.

**15** Amb týayarusin, Apanllpa tsiyateersin, izuuru Jonasaa marish kapeetaranganaya. Ashiri marsha izuuru zanayatara sheeru, zanaramach ashirangiya. **16** Anoo parangusin, botee ksutamapanshtisin kapung Apanlee chinranganaya. Apanlee kuk izuuru payuranganaya. Maacheetsi chinuzee Apanleem wayayarisin, mbutarangsin, Apanlee kuk izuuru tuminuranganaya.

**17** Ashiriya, waana Apanll kayupchee wataramashi wayayaru, Jonasaa pisharangiya. Jonassha kayupchish chik tuchip zari psaanpatari taarangiya.\*

## 2

**1** Ashiri Jonas kayupchish chik taaru, Apanllpa tsiyatarangiya.

---

\* **1:17** Yuwaa nish átu anooststam Matiwa 12.40 tayusima kamankiya.

- <sup>2</sup> Apaa, nuwaanamand yutaritshishiri shiaya mashkina.  
 Itaru, shiysha Apaa, yuwaa nuw shiaya mashki anoo mazinangcha.  
 Izuuru tsipamaam waritakuri, shiaya mashkina.
- <sup>3</sup> Shiy imurish marush nuwaa kasarangsha.  
 Kungsha nuwaa waras purangiya. Nuwamunsha kung warastatar ashirangiya.
- <sup>4</sup> Itaru, nuwsha shiaya wanasmirimshirish tácharangina.  
 Ashiri nuwsha mangishi chinakuri, Apanlee pang' ndunpari pangchina, táranguri,
- <sup>5</sup> kungsha izuuru nuwaa purangiya. Imurish wantsush nuwaa tapshturanginya.  
 Mishat, tundunarputssha muchimunutamti izuuru kpatarangiya.
- <sup>6</sup> Nuw izuuru kungush wantsush yangarangina.  
 Tsapumun tamoo ashirangina.  
 Yuwaa ashtachish anoo nuw urutari wasina waneeshee yasarangina.
- Ashiritaa Apaa, shiy nuwaa tsipani tapachindarangsha.
- <sup>7</sup> Nuw, Tcipachparina, táranguri, anush shiaya yusur chinarangina.  
 Apaa, pangimandish nuwaa kuki yuwaa mashki anoo mazinarangsha.
- <sup>8</sup> Itaru Apaa, yuw tputs apanllputsee chinakana, anshitisin nda shiaya wanasiyem ínakanaya.
- <sup>9</sup> Itaru, ayamsha nuw zurampatari maachi wayayruri, shiayaam muchchima.  
 Watam shiy nuwaa tapachindakshawa,  
 Jonas kayupish tápun taaru, tárangiya.

<sup>10</sup> Ashiri Apanll kayupchee kamachtarangu, kayupichsha Jonasaa tsapumun wanasisrimun katarangiya.

### 3

*Apanll Jonasaa yusur, Ninipip nuwaa kuki kamaningcha, tárangiya*

<sup>1</sup> Ashiri Apanllsha yusur Jonasaa tsiyatarangiya. Kamachtaku tárangiya. <sup>2</sup> Naayarush, yaktap Ninipi kamanishini, yuwaa nuw kamachtayanlli anootsi, tárangiya.

<sup>3-4</sup> Ashiri Jonassha tayuyaru, Ayu, táyaranllu, yaktap Ninipip naatarangiya. Yuvari Apanll waana kamachtayaru, anuri naatarangiya. An yakat kapungumuncha. Ashchiri napamaam tuchip zar waritarangiya. Itaru, Jonassha anush yakat pshturangu, minamari zar naayaru, anush apusanand kapung tsiyatku tárangiya. Apanll mikeeru waneekchu, nimun 40 maats izuuru kachingchiya, tárangiya.

<sup>5</sup> Ashiri tputssha kurakaw, misha tiptsirtam ichingaru Apanllee mangoonaranganaya. Sheersin, izuuru tachitaranganaya. Ashiri mang' mantsaksin, Apanlleem manguyani atusin, wamar kuchariwaa kamartaranganaya.

<sup>6</sup> Ashiri tsiyatsissha Ninipshuchish urkar kusarangiya. Uwsha kurakush pang'shitungeeru, wamar wanasisimshee yusheeru, wamar kuchartamsha kamartayaru, tsapushtamsha kuxinarangiya. <sup>7</sup> Anumunsha, kurak wipunashee kamachtaku tárangiya. Na nimun ktungintspa pakchiyama. Mishat, wakaraamtam

maritarintspa. Kungootstam yasintspa, kurak tsiyatku tárangiya.<sup>8</sup> Tputs siyaa pamaam ichingurus kamaris kuchar kamartangtsa. Anamun tputs siyaa yasamaama yuwa mangis mantsakis anootsi. Sheerus, izuuru mangiptis Apanllee mashangtsa, yutaritshishireetsis tachingamaama. Yuwa mantsir chinakis anoo zurampatari ksangtsa. Tputspatatis yutarit waratkis anootstam ksangtsa.<sup>9</sup> Wapaz Apanll iyaa mapiykchu, misha watsiyun zambazakchu, itaru ashkachinaari chiy tsipacheezich ndambari, kurak tárangiya.

<sup>10</sup> Ashirucha, Apanllsha yuwaashkana anoo parangu, izuuru mapiyrangiya. Ndusha tputsee wanimaaam zandarangiya.

Ashiriya, kamaneena yuwa Jonasarini Ninipishuchee Apanllee kuk kamanirangu anootsi.

## 4

*Ashiriya, kamanchintspayuwaa Apanllyutaritshishpaneetputs nayaniku anootsi*

<sup>1</sup> Ashiri Jonassha kizpur tsiyantarangiya, yuwamand Apanll tputsee tunaree Ninipishuchee nda waneerangu anumanda. Kapung mang' mantsarangiya. <sup>2</sup> Jonas, Apaa, nuw shiyya yasaktana. Shiy Apanlltishcha. Taarashipanish chinampanish. Ashirucha shiy nda musá tsiyantaksha. Watam shiy Apaa, kchinamishawa. Ashirucha, nuw tsapunshi taaruri, ¿Antaati shiy Ninipshuchee tunaree wanicheezish? shiyya tárangashina. Mangupari waneeshish tushiychiya, tárangina. Ashirucha, nuw anumand

tsiyantayaruri, Társisup botish suwarangina. Watam shiy wanimaaam mapiykshawa. Tunareetstaa wanasis chinaksha, Apaa. Nayanikush nda waneeksha. <sup>3</sup> Ashirucha Apaa, nuw shiyaa mashkina. Mikeerush nuwaa tsipamaam wayangandama. Nuw arangeem taamaam zandkeezi, Jonas Apanlee mashku tárangiya. <sup>4</sup> Ashiri Apanllsha, ¿Shiyaam tsiyantakish, an wanasis? tárangiya.\*

<sup>5</sup> Jonassha yaktash shitungeeru naatarangiya apuspi. Sheeru, amb naayaru, watambureem tambtayaru, watamburish pshtuyaru taarangiya. ¿Mayaja yaktash tushiyich? ¿Kamapari Apanll wanichiya? átu, anshurisha kutarangiya. <sup>6</sup> Ashiri Apanllsha watamburimun karutaa wayarangiya. Karutsha Jonasamun watambur káreeru, izuuru yambutarangiya. Itaru, Jonassha watamburish mang' kis mapiyru kuxinxinaw ashirangiya.

<sup>7</sup> Ashiri putamsha tarasitanu, Apanll yusur mbichaa zanganirangitamta. Mbichsha puruzee katureeru, puruzsha izuuru pchiruyaru, tsiparanginya. <sup>8</sup> Zarsha yakatanu, Apanllsha kambusuroo zanganiranginya. Kambusursha kambustaranginya. Ashiri zarsha Jonasamun much kizpur zataranginya. Ashiri Jonassha sambaytaranginya. Tsipamaam waritaranginya. Jonassha tárangiya.

Izuurinacha tsipakuri waritasha. Taakuch, kiyung kachiyakchi, Jonas tárangiya. <sup>9</sup> Ántaru, Apanllsha, Zuraktishcha. ¿Shiyaam kamiran tsiyantamaam waritariya? Itaru, ¿na watam

---

\* **4:4** Lukasa 15.31-32 tsiyatsis nipta tatsamooru taaritamta.

puruz tambureetsish yambutarangu an  
pchiruyaru tsiparanguwa? Apanll tárangiya.  
Jonassha, Zuraktishcha. Nuwaantaricha  
zurampatari tsipamaam zandki, Jonas tárangiya.  
<sup>10</sup> Apanllsha, Zuraktishcha. Shiy nda shaana  
karutaa tatsumarangsha. Mishat, nda shaana  
yanungarangsha. Itaru, psaan wanitari  
shitungarangiya. Sheeru, yusur putamsha  
tsiparangiya. Itaru, shiy anoo wanasis  
chinarangsha, tárangiya Apanlli. <sup>11</sup> Itaru,  
nuw Ninipshuchee aranginasha chinamaam  
waritariya. An yakat kapungcha. Anush nllur  
zapan taariya. Washunand nllurnandari 120 mil  
washunand taariya. Anumunsha chinuz wakar  
zapantam taaritamta. Ashirucha, nuw anoo  
chinakuri mapiykina, Apanll tárangiya.

Ashiriya, na kamaneena yuwaa Apanll yutarit-  
shishee tputs nayniku anootsi.

[Ashiri wappari. Watamaricha Jonasarini  
kuku.]

**Apanlli Kuku  
New Testament in Candoshi-Shapra  
(PE:cbu:Candoshi-Shapra)**

copyright © 2010 Wycliffe Bible Translators, Inc.

Language: Candoshi-Shapra

Translation by: Wycliffe Bible Translators, Inc.

Candoshi-Shapra

cbu

Peru

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Candoshi-Shapra

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 11 Nov 2022 from source files  
dated 29 Jan 2022

855c1646-aaa4-5dab-a701-8197de4af05f